

Tge è sa midà en quels onns

Retschertga tar anteriurs presidents dal cussegl grond

DA GION NUTEGN STGIER / ANR

■ **Ier èn ina rotscha anteriurs presidents dal cussegl grond s'entupads a Cuira per visitar il parlament grischun, per star en cumpagnia e cunzunt per laschar reviver il temp ch'els èn stads ils pli «auts» parlamentararis da noss chantun.** Ina anteriura presidenta dal cussegl grond ed a quatter da ses collegas avain nus dumandà: Tge è sa midà en quels onns en il parlament e tge mane-giais vus dal nov sistem electronic per vuschar en la sala dal cussegl grond?

Not Carl, Scuol

En quels onns è sa midà bler. Cura che jau era en il parlament chantunal eran quai adina quatter emnas a l'onn ed uss en quai daplis giadas a l'onn, dentant sessiuns pli curtas. Tras quai patescha segir l'amicizia tranter ils deputads e las deputadas. Ils discurs dasper la sessiun e suenter la sessiun mancan tenor mai. Quai è dentant l'ir cun il temp. Il vuschar electronic è damai in basegn dad oz.



Ida Derungs, Cuira

Jau less dir che sa midà è en quels onns che jau appartegn betg pli al cussegl grond betg uschè bler. En tuts cas hai jau l'impressiun dad esser spert puspè dachasa en la sala dal cussegl grond. Il contact era da mes temp fitg bun cun avair quatter giadas a l'onn sessiun. Quai manca oz segir cun ir blers la saira a chasa. Jau sun cuntenta che da mes temp era il vuschar

electronic anc nagin tema. Per mai è quel sistem me-mia pauc personal. Avair visual contact cun il vischin durant las votaziuns è adina stà ina chausa plaschaivla. Il vuschar electronic è bain ina tscherta anonimad. Gist quai disturba mai, da l'autra vart è oz dad ir cun il temp.



Gieri Luzi, Tgazzas

Tge ch'è tut sa midà è grev da dir cun jau betg ple esser tant preschent al cussegl grond. Jau hai l'impressiun che da mes temp en il parlament grischun avevan nus ina meglra collegialità, quai betg mo durant la sessiun, mabain er ordvart quella. Ja crai ch'i dovria er quels contacts ordvart la sessiun per schliar intgins problems. Il vuschar electronic avess jau gì fitg gugent da mes temp e quai avess fascinà mai zunt. Quai è in svilup dal temp.



Baltermia Peterelli, Savognin

Midà il pli bler è che da mes temp en il cussegl grond cuzzava quel quatter emnas per onn. Quellas emnas eran reservadas per ils deputads sco er per ils commembers da la regenza e quai il di sco era la saira. Da di vegniva fatg politica en il

cussegl grond e la saira lura er sur las fracziuns e quai purtava tenor mai fitg bler. Cun esser sis dis a Cuira avev'ins er occasiun d'entupar in di in cusseglier guvernativ per discurre intgins problems da l'atgna regiun e l'auter di magari in schef dad in uffizi per discurre da quels problems. Pertutgant il contact e l'amicizia è quella midada da far daplis sessiuns segir betg uschè ideala. Per mai era il sistem vegl megler. Il vuschar electronic è segir pli pauc anonim, dentant sche quel sistem è megler ston lura ils singuls deputads dir.



Gion Schwarz, Mustèr/Cuira

Jau sai betg exact tge che ha midà. Jau hai dentant l'impressiun che tut è vegnì in pau pli hectic, pli pauc communivel e cunzunt midà è segir che las sessiuns èn pli curtas. Jau hai dentant l'impressiun che da preschent appartegnan al cussegl grond nagins da quels «chaus dirs». En quel senn èsi segir plitost in parlament cun calma. Quai che pertutga il vuschar electronic sai jau betg tge valur che quai ha. Da decider ha il cussegl grond en tuts cas adina sur dals medems temas politics er sch'i vegn vuschà electronic.

